

HOMENAGE PRECIOSO Y EMOCIONAL PA JUBY NAAR

Diasabra anochi den Centro di Bario Dakota, Popcorn Club a tene su Festival di cancion y na mes momento tambe, a duna homenage na Hubert "Juby" Naar pa su labornan riba diferente tereno den transcurso di añanan, un homenage cu tabata hopi bunita y cu Juby mes a considera un di e "homenage nan mas bunita cu mi a yega di presencia".

Algo pasa di 2 or a cuminza e grabacion cu voznan di entre otro Ito Tromp, Ruben Garcia, y Ronny Eckmeyer di Cabaret Picante kendenan a resalta trabaoonan di Juby, riba tereno di juventud, canto, teatro, cultura en general, turismo cu Bon Bini Festival, e persona trahador, semper cla pa yuda y guia otronan, su trabao periodistico etc.

Esaki a culmina cu "vuurwerk" despues cu entregamento di plaquette di "su yiunan di Popcorn Club". Tabata momento masha emocional pa Juby ora cu el a dirigi palabra pa

gradici pa e honor cu a ser duna na dje y na dado momento no por a mantene su lagrima, expresando cu e ta haya masha falta di su señora cu no por tabata sinta banda di dje e anochi aki (debi na enfermedad basta aña caba).

Seguidamente Edgin Semeleer a canta Juby cu musica di "Mi Pais" y palabranan dedica na Juby.

Un toque masha humoristico tabata ora cu e Limbo dancer Vincent a invita Juby pa balia limbo y na lugar di laga Juby mes pasa bao di e lata, a hisa Juby y pasa bao di lata cu Juby Carga. Riba e combinacion di portret aki por haya un impresion di e anochi-aki cu Vincent Cargando Juby, momento di ricibi su plaquette, Edgin Semeleer cantando, parti di e elenco di Cabaret Picante cu a presenta cada un cu un regalo pa Juby, y Juby na mesa den compania di Sr. Lorenzo Salas y haciendo su anotacionnan pa resenia di e cantantenan di e festival.

